

E la drenta Salon di Fama di Washington y haya Premio Jackie Robinson

Periodista Arubiano Maureen Bunyan honra cu dos premio cotiza den mesun siman na Merca

E ta anchor di canal prestigioso den capital di Merca Washington DC



ORANJESTAD – Den menos cu un siman, un arubiana ta logra dos premio cotiza na Merca. Maureen Bunyan, un periodista naci na Aruba , y biba practicamente henter su bida na Merca, a wordo honra cu no menos cu dos premio y honor. Uno ta su entrada den e ‘Hall of Fame di capital di Merca, debi na su contribucion pa cu e ciudad, y a haya tambe e Jackie Robinson Community Recognition Award. Un reconocimiento pa hendenan di color.

Mester bisa cu esaki ta apenas algun di e multiple premionan cu Maureen Bunyan ta ricibi.

E ta un dama cotiza y hopi poderoso den Washington, DC. Su trayectoria ta uno sumamente largo y impresionante. Un logro hopi grandi pa un persona cu ta yama Aruba ainda su cas, y cu ta carga su pasport hulandes cu hopi orguyo.

Pa loke ta e Washington DC Hall of Fame award, esaki ta reconoce residentenan y personanan regional cu tin un impacto sobrenatural riba e ciudad. E homber y muhernan aki ta contribui pa decada na servicio ehemplar y ta sostene e ciudad den varios capacidad. E Legacy Award a keda establece

na 1998 pa dr Janette Hoston Harris, pa reconoci 11 persona anualmente den diferente area. Negoshi, comunicacion, arte cultural, trabou comunitario/ civic, educacional, medicina, lei, politica, religion, ciencia y mucho mas.

Paloketa e otro reconocimiento esaki ta trata e premio Jackie Robinson Community Recognition Award, recordando e legacy di Jackie Robinson, un pelotero di color cu a drenta Liga Profesional di Baseball Mericano 62 aña pasa. E aña aki George Washington University lo presenta e Jackie Robinson Community

Recognition Awards na entre otro columnista pa Washington Post Michael Wilbon, WJLA-TV news anchor Maureen Bunyan y activista pa derechonan civil humano Franklin Kameny. E otorgamento di premio a tuma lugar siman pasa den e Jack Morton Auditorium of GW’s School of Media and Public Affairs Building.

Maureen ta un di e periodistanan mas renombra y reconoci na Washington DC, Capital di Merca. Actualmente como anchor principal di e canal di television ABC su afiliado WJLA-TV , e tin

un tarea increible di raporta noticia y ta activo den varios sector di comunidad. Fuera di su trabou como periodista, e ta hopi activo dunando lectura constante pa varios instancia na Washington y becindario.

Naci na Aruba, na edad hoben e la sa di muda cu su famia pa Merca, y a establece su mes entre e prominentenan di Washington despues. E ta bin Aruba sigur algun biaha pa aña, y ta topa cu su amigonan keri cu e tin na Aruba ainda. Maureen practicamente tabata na Aruba cada pasa luna, durante e ultimo añanan y no tin pensa di cambia esaki.